

TANEE PEDRO NAAJIONEE

Pedro saruhuatascari narta Pueyaso pueya

1 ¹Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiutitiquiaari pocuaji Tacuna Jesucristoocua, taa nocua canaa tiuquiaaricuaani. Nocua nia tiuuniuni, cunoori jiyanhua panishano. Naacujitij, Pueyasoori nia jiyanoocuiaa juhua sesa miyashijiaca nia quiniuria na niquiara, taa canaa quiyacuani. ²Seetanujanaa maatia nia niishitiriquia Pueyasoni, pa Jiyaniijia Jesunio. Naacujitij, niaari socua jiyanhua cumaquishaanutaniya. Nioojiaari cajitishaanutaniyajuhuj, juhuajaniya quijiaca nia quiniuria.

Pueyaso pueya cuaara nio niishitiojosano mijiaca quiiria

³Jesucristojuanaacuajaari pa sequequiaari na pueya pa quiniuria. Paari na masuunu tojiqiaarini, pa niishishacari nojuajaari seetanujanaa Pueyaso Niyanu, tojetaarucujanaa maninia mijiaca. Seetanujanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujanaa na tojiijaca pa quiniurijuhuj. ⁴Naa jiyanhua maninia mijiaca Jesucristo quiniucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujanaa maninia, tojishocoriquiano. Paa jaara na sequesano

tojitiajaca quiri seetanujanaani, paari jatanishaanutaniyani juhua nojuaja pa quiniurijuhuj. Naacujitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriqiani, paa maara tojetaarucujanaa seseriquiani, taa mijiria quiniaa pueya sesequiaacuani tama nojori panishano mijiicajaja nojori quiniucua. ⁵Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuuijaca. Naa nocua tiuuijaca nia quiniucuatej, jiyanhua nia saniniujiuri maninia mijiaca nia quiniuria pueyacaanu. Naa maninia mijiaca nia quishacaritij, jiyanhua nia saniniujiuri socua niishijiaca nia quiniuria, sesa miiniu nia ruuretanura. ⁶Naa niishijiaca nia quishacaritij, jiyanhua nia saniniujiuriquia tama nia cuaqueya miiniu panishanojuaja rejetejaca nia quiniuria, maja nia miiniuria sacuraatia casaa nia panishano. Naa tama nia cuaqueyajaaja rejetejaca nia quishacaritij, jiyanhua nia saniniujiuriquia juhuajaniya sashijiaca nia quiniurijuhuj. Naa juhuajaniya sashijiaca nia quishacaritij, jiyanhua nia saniniujiuriquia seetanujanaa Pueyaso panijiaca nia quiniuria. ⁷Naa Pueyaso panijiaca nia quishacaritij, jiyanhua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij,

jiyanohua nia saniniujiuriquia tojetaarucujanaa panijiaca nia quiniuria.

⁸Niaa jaara puetunu nio niishitiojosa-nojuanaa tojijiaca quiriquia seetanujuanaa, majaari najuhuana pa Jiyaniijia Jesucristo niishijiaca nia quiniu quiniutianiya. Naajuhuj, majaari najuhuana quijiaca nia quiniu quiniutianiya. ⁹Nio rootasano tojiyashijiaca saniniuujia, nojoriiri juhua cariojuaru, niishiyashijiaca. Naa nojori quiniuucuatej, nojoriiri niyajetaquiaa nojoricuajaari juhua jeequejosaaquiaari sesa nojori miishanojiniji. ¹⁰Cuarta Pueyaso pueyanaa, Pueyasocujaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriquia seetanujuanaa. Naacuajitij, niocua niishiri niaari seetanujuanaa Pueyaso pueya. Majaari quenaaja nocuaji nia rupatenu quiniutianiya. ¹¹Naa maninia quijiaca nia quiniuucuatej, niaari shuquiriaatia tiuquinitiasaanutianiya jiyocuacaanu pocuaji Tacuna Jesucristoocua, pueyacaanu nata nia quiniuria, pueyaracaanu Jiyaniijiajanaa na quiniuucua.

¹²Niaacuajaari maatia niishitiojosaa-quiaari Pueyaso rupaa Jesucristojiniji. Niaari cuno seetanujuanaa rupaacua tiuujia. Naajaa, janiyari pueyaracaanu nia niishitiniutianiyani, maninia nia racatanura nia numaama. ¹³Mijiria cua rishishacarijia, Jesucristo jiyaramiquishano cua quiniuucua, maniniacuajaari pueyaracaanu cua shiniujiuniuria niajaniya, maja tariucua nia niishishano Jesucristo rupaajiniji nia niyajetanura. ¹⁴Pa Jiyaniijia Jesucristoori tari cua niishitiriucuaa janiyari quera mosaanutaniyani. ¹⁵Cunora, janiyari nio naajiya niaarani. Naacuajitij, janiya jaara mosaareni, niaari nio cua naajionee jiitianutaniya cua nuhuaji nia serojosoco-

riquiano. Maniniacuajaari nia jiitianura cua naajionee maja nia niyajetanura puetunujuanaa cua niishitiojosano niajaniya.

Shacantuuca Jesucristo cumaaca niquiniaajiniji pohuatasano

¹⁶Canaa niishitiojosano niajaniya pa Jiyaniijiajinijini, cunoori maja canaa tojishano tamonujiniji. Naajuhuj, cunoori maja tama niishijiacaaja pohuatasano na sapojonura pueya. Jesucristo cumaacajiniji canaa pohuatasanoni, naajuhuj, taa na tiuquiniutianiuhuani, puetunu cunojuanaari maja tama canaa niishishanojuaja. Canaajanaacuajaari canaa namijiatajanaa na niquiquiaarini nojuaja jaara shacantuucara jataquiaari canaa niquiara. ¹⁷Jiyacaritij, na Que Pueyasoori jiyanojua na timitiariquiaa canaa niquiara. Canaari na tojiquiaarini naa na sequesacari Neyanujinijitij: “Nojuajaari Quiyanuniyojua. Jiyanojua cua timitiasano”. ¹⁸Canaa quishacari pa Jiyaniijiaata shacantuucara na jatasacari tuhuananuucua, canaajanaari naa Pueyaso tojiquiaari jiyocuacaanuji pocuaanoni.

¹⁹Canaa tojinuuucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuaaanu nojuajiniji pueyara Pueyaso sequesano caminiujitunaa sequesanoori seetanujua-naajuhuj. Naaratej, maniniacuajaari nia tojinuria nojori naajiotasano Pueyaso Jiyarosocoriquiano Pueyanojiniji. Nojori naajiotasanoni, cunoori poojajinia cuhuataquiaa, naatej, taa samaritiu cuhuataa ninishiquicuaani, cuaara juhuaquemajaatijia. Pananuuri saniniuujia muetanutaniyacujua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰Maninia nia niishiri nio, pueyanaa. Puetunu tariucua-

caanu Pueyaso sequesano caminiujiunias naajiotasanojuanaari maja na naata niishishaanu maatia tama pa niishitiajtajaaja. ²¹Tariucuacaanu Pueyaso sequesano caminiujiunias naajionuutasanonni, cunoori maja tama nojori niishishanojuaja. Pueyaso Sohuanujua-naacuaajaari nojori niishitiquiaari nojori pohuatanura Pueyaso sequenu panishano pueyara.

Sacuaratia miijiaca niishitiojonaajiniji pohuatasano

2 ¹Tariucuacaanu, noojiaqueya Israel pueyajiniinioori tama na cuaqueyajaaja jiyatequiaari juhua Pueyaso sequenu panishano caminiujiunias nojori quiniuria. Naacuajitij, nojoriiri narta Israel pueya sapojonuquiaari. Naajuhua cua panishano pueyanaa, sapojonuujacaari nia tajiina supuenutaniyajuhua. Nojori niishitiojosacari sacuaratia tama nojori niishishanojuaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacuajitij, nojoriiri tama nojori Camarnujuaaja tamacanutaniya, cante nojoriicuaa mosaaquiaaricuaajani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. ²Queraatia pueyari sacuaratia miijiaca quiniutianiyajuhua, sacuaratia cuno pojori niishitiojosano tojjiaaca nojori quiniuucua. Naa nojori miiniuucuatej, Pueyaso niishiyashijiacaari seetanu rupaajanaa sesacanutaniya. ³Cuno sacuaratia niishitiojonuujacaari jiyanhua casamiriaca quiniuucua jiaatiajaca quiniutianiya. Naaratej, nojoriiri najuhua shanohua nojori niishitiojosanota nia sapojonutaniya, nareja nia niqutiojonura nojori nia cumaneeca, nia casaminio. Naajaa, naa sacuaratia miijiaca nojori quiniuucuatej,

nojoriiri tariucuacaanujiniji Pueyaso riuriosanocuaa na saniitiosocoriquiano. Majaari Pueyaso jiyanooni quiniutianiya nojori.

⁴Naajuhua, Pueyaso seya jaara sesa miiquiaari, majaari Pueyaso jiyanooni quiquiaari nojori. Pueyasoori puereeta nojori quejooquiaari ninishiqui. Tii nujatejosano quiyari, nojori saniitiosaanu juuca cuaara quirijiaatijia.

⁵Naajuhua, Pueyasoori Noé quishacari sesa miijiaca pueya jiyanoa quiquiaarijiuhua. Cuno sesa miijiaca pajaashitiani quiaariiri nojori cusununuura puetunujuanaa. Saaja Noé curoquiaariiri Pueyaso tojjia na quiniuucua, socua siete pueyanio. Noeri pueyaracaanu cuno sesa miijiaca pueya numootequiaari juucua, nojori tacatonura noojia Pueyasocua, sesa nojori miiniujiniji. ⁶Naajuhua, Sodoma* tiacajinia quiniua pueya quiniuucua jiyanhua sesa miijiaca, Pueyasoori cuno tiaca catijataquiaari tojetaarucuaajanaa juacara. Naa catijataquiaari Gomorra tiacajaariuhua. Cuno caapiqui tiaca naa catijatasaaquiaarini, cunoori quiquiaari cuno nuhuaji quiriquiano pueya na numoote-nura maja naa sesa miijiaca nojori quiniurijuhua, nojori mariqui saniitiosaarejaariuhua. ⁷Sodoma tiaca Pueyaso catijatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jiyanhua taajequiaari tari, cuno pueya mijionuucua sacuaratia casaa, tariucua nojori jiiitishano casaacua.

⁸Puetunu juucajanaa, Lotri narta Sodoma tiacajinia quiniua niquiquiaari cararatia miitioojiano. Sacuaratia nojori pocoojonu tojiquiaarijiaariuhua. Maninia pueyano Lot quiniuucua, nojuajaari jiyanhua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot

mashiquiquiaari cuno pueya tajiniji.
⁹Naacujiti pueyanaa, paari niishiyani, Pueyasoori na tojtiajaca pueya cojuaja, maja nojori miitishaanura sesa. Saniniuu-jia, Pueyasoori sesa miijiaca racatajajaara nujuatejosano, nojori saniitiojosaanu juucara. ¹⁰Pueyasoori socua jiyanohua nio pojori saniitioriquiano: na camishoo maajipohua numuetucunuucua jiaatiajaca, maajishuriu numuetucunuujucajuhua, noo pojoriujiuhua, pa Jiyanijia rootasano ruuretajaca saajatej. Naa sacuaraatia miijiacani, nojoriiri tojetaarucujanaa tojiyashijiaca. Majaari na pueretunu quiquiaa sacuaraatia tama nojori panishanojuaja nojori miiniuria. Naajuhua, nojoriiri maja na pueretunu quiquiaa jiyocuacaanu cumaacaraca quijiaca na sesacanura. ¹¹Saniniuuja, Pueyaso seya cutaraari jiyanohua socua cumaacaraca cuno sesa miijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijiaca nojori sesacanura.

¹²Cuno pojori, saaja sacuaraatia miiniuria niishitiojonaani, nojoriiri niishiyashijiaca. Nojoriiri juhua nacujiniaaco quijiaca casami, teyanote saaja puecosocoriquiano roosaquiaa-cuajani. Tojetaarucujanaa niishiyashijiaca nojori quiniuucua, nojoriiri maninia quijiaca pa quiniuria pa Jiyanijia rootasano sesacaquiaa. Cunora, nojoriiri juhua puecosocoriquiano nacujiniaacobi casaa. ¹³Naacujitij, nojoriiri naquiya miishocoriquianojuhua, naquiya nojori miitianuucua narta pueya. Nojoriiri jiyanohua timiquiaa nojori jaara naata quiriquia sesa miiniu juucajuhua taa nojori miiquiaa niucacuanaani. Cuno pojoriiri sacuaraatia miijiaca. Majaari na niishiniu caririquiniu. Nojori sapojonucua niajaniya, nojoriiri jaarajaaja nia cojiquiaa nia queranacunuusaqui. Naa

nojori quishacari nia tajinatej, nojoriiri jiyanohua timiquiaa tariucua nojori jiitishano sesa casaacua nojori niishirio-josacari. ¹⁴Naacujitij, nojoriiri maja nareja na niquiniu quiquiaa maajipohua. Puetunu maajipohujanaa niquitiuquiaa nocua na jiaatianutaari. Nojoriiri maja na taajenu sesa na miiniuria pueyaracaanu. Canapute jatarinitiaja pa Jiyanijia tojiijiani, cuno pojoriiri nojori shiniuquiquiaa na sapojonuta, sesa nojori miiniurijuhua. Naajuhua, cuno pojoriiri tariucua jiitinio puetunu nojori panishanojuanaa nojori jiitianura, jaara na naata quiriquia. Nojoriiri tariucua Pueyaso jiyatesano na saniitosocoriquiano. ¹⁵Pueyaso rootasano tojiyashijiaca nojori quiniuucua, nojoriiri juhua tashuquioono Pueyasocua neteja nuujiniji. Nojoriiri casamiriaca quiniuucua jiaatiajaca juhua supuetana Beor niyanu Balaam*. Jiyacaritij, Moab jiya jiyanijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanohua queraatia casami na niquitionutaniya, nojuaja jaara nocua quiaare, Israel pueya na shimiojonura nera. ¹⁶Casamiicua jiaatiaja na quiniuucua, Balaamri na seru nijinia cajiquiaari. Quiaareeri. Nucuacono quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacujitij, pocuaashijia seruuri Balaam tarinitiquiaariuhua, juhua moseeca sesa na miiniu panishacari juucua.

¹⁷Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhua, nojoriiri juhua niquitioocua paratu piyarojosano, tamoco quiamaa saajaari. Nojori niishitiojosanoori naajuhua. Majaari na tojtiajaca na naacunu. Pueyasoori jiyanohua ninishiqui quiquio tari jiitiaa nojoriicuaji, pueyaracaanu nojori quiquiorano.

¹⁸Nojori pohuatasanoori najuhuana shanohua tojishano. Saaja sapojonuuri. Naacujajiti, nojoriiri shusha Jesuucua tiuuijaca shiniuijuquiaa nojori miiniuhua-ra tama nojori cuaqueya panishanojuaja. Cuno Jesuucua tiuuijacuajaari shusha naataja sesa miijiaca pueyajiniinio jatanishaariquiaa juucua, Pueyaso tojijiaca nojori quiniuria juucua.

¹⁹Sapojonuujuaa cuno niishitiojonuujua-ca quiniucua, nojoriiri pueya niishitiojuquiaa sacuraatia. Pueya niishitiojuquiaari, nojoriniaari seetan-juanaa juhuajaniya quijiaca quiniutianiya shuquiriaatia, nojori jaara nojori niishitiojosano tojijiaca quiriquia. ¿Nojori niishitiojosano pueyatucua taa juhuajaniya quijiaca quiriquiani, tama nojorijiaaja jaara sesa miiniucua jitiinio quiyajaa? Seetanujuanaari, pueyano jaara maja na naata quiriquia sesa casaa na miijonu tarinitianu, cuno pueyanoori seetanujua-naa juhua tama sesa na miiijosano serujuaaja. Majaari na naata na tarinitianu. ²⁰Pueyanaa, niaacuajaari niishiya, pueyano jaara pocuaji Tacunaacua tiuuijara quiri, pa Jiyaniijia Jesucristoori na cumaquijia na tarinitianura sesa miiniuria na jitiishano. Saniniuujia, cuno pueyano jaara sesa miijiara quiriouhua, nojuaja jaara sesa miijonura jitiiriohua socua, neraari socua puereeta quiniutianiya Pueyaso niishiyashiaca pueyajiniji. ²¹Naacujaji pueyanaa, pueyano jaara seetanu rupajanaa niishijia quiriquia, nojuajaari cocuaatia miya jaara na samiritiarohua sesa miiija na quiniuhua-ra. Cuno pueyanora maara socua maninia quiquiaari maja na niishiniuria Jesucristo rupaa, teyanote na niquiara pohuatasaa-quiaaricuaajani, jatanishano pueyano na quiniuria. ²²Naa pa Jiyaniijia samiritiaja-ca pueya quiniuucuatej, sesa miijiaca nojori quiniuhua, nojoriiri nio tariucua-caanu Pueyaso Rupajinia naajiotasano

tohuateequiaa. Naa miriqui sequeyari: “Sareeri coteenu macayoree. Na miaque-rohuari”. Naajuhuaj: “Cushiiri nanatosaaree juucua. Saaja na cooquioji-nia neeneecuasuhuariuhuj”.

Pa Jiyaniijia tiuquiniuhua cuaracashitishacari

3 ¹Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojinia, janiyari nia nacasuquiaarini socua cua shiniujiuniuria niajaniya maja nioojia niquijijotejaca nia quiniuria Pueyaso rootasanojiniji. Janiyari naa miya quiarijia nio cua naajiojiniajuhuaj. ²Maninia nia numaama nia racatariquia tariucuaacaanu pueyara Pueyaso sequesano caminiuiuninaa pohuatasano, pa Jiyaniijia jiyaramiquishano pueya pohuatasanonio. Cunocujaari pocuaji Tacuna rootasano pajaniyara.

³Nio nia niishiriquia cutara pueyanaa. Quera nio jiya puequesacari, pa Jiyaniijia soojeacaari supenutaniya. Nojoriiri tama na cuaqueya miiniu panishano miijiacajaaja. Na macatiniuria niajaniya, nojoriiri nia nequesotanutaniya: ⁴“¿Taa nia Jiyaniijia miiquiaarini? Nojuacuajaari nia sequequiaari: ‘Tacatenutaniuhuanijia’. Majaari na tiuquiniu. Tariucuaacaanu na niquiniaa pa supetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari quenaaja tamonu casaa jatanu quiquiaa tamaatia-ra”. ⁵Majaari naate pueyanaa. Cuno pojoriiri tariucuaacaanu Pueyaso miishanojiniji niishiniu paniyashiijaca. Jiyanhua tariucuaacaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujiajinia na quiniuria. ⁶Na nuhuaji, Pueyasoori cuno mohuacaja pajaashiti-

quiaari puetunu mijiria quijiacajanaa na cusojuanura. ⁷Quiarijia saniniujuia, jiya cajiniocua, nio jiyanio, Pueyasoori na cumaacata nojori jiitiaajaara. Na nuhuaji cutara, puetunujuanaari catenutaniya, Pueyaso saniitiosacari puetunu na ruuretajaca pueyajanaa.

⁸Naajuhujacua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niquiriyatu juucaari juhua mil* marijia. Naajuhujacua, mil marijiaari juhua niquiriyatu juuca nera. ⁹Majaari nia jiyaniniu maja pa Jiyaniijia tacatenu quiniutianihua. Majaari na tarishiniu najuhuanaj, taa tamasaca jiyaniyacujani. Maja. Maja cutaraari na paniniu pueya quejoosaanura mani quiquiojinia. Naacujatij, nojuacuajaari pueya sashiyajaara nojori tacatonura nojori jiuujia sesa nojori miiniujiniji, Pueyaso pueya nojori quiniuria.

¹⁰Naajaa, nojuacuajaari tiuquiniutianihua. Pueya jiyaniishacari Jesucristo maja na tiuquiniu quiniutianihua, jiyacaritij, canashiyajui tiuquiniutianihuari. Juhua nohuasejojua tiuquiniutianihuari, sesa miijiaca na saniitionura. Na nuhuaji, jiya cajiniocuaari shaajenutaniya. Jiyanojua cojuatunenutaniyari na shaajesacari. Casaajiniji jiya shipinishaaquiarini, cunoori puetunu catenutaniyanaa. Naacujatij, jiyari puetunu mijiria na jiitiasano casaatajanaa shaajasaanutaniya jiyanojua naseeca manijinia.

¹¹Quiarijia pa niishishacari taa pa jiya shaajasaanutaniyani, cunora, seetanujanaa Pueyaso panijia nia quiriquia saa maninia miijiacaja nia quiniuria. ¹²Naa maninia miijiaca nia quiriquia, Pueyaso cuaraa pa Jiyaniijia mueraterohua pocuajaatijia. Pa Jiyaniijia sequesano tojijia nia quiriquia, na tiuquiniu juuca nia secootenura. Jiyacaritij, Pueyasoori

jiya cajiniocua setanutaniya. Naacujatij, casaata na shipiniquiaari puetunu casaajanaani, cunoori manijinia mohuaquenutaniya. ¹³Naajaa, Pueyaso cutaraari seetanujanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

¹⁴Naa nia niishishacari casaa pa sashiyani nio pa quishacarini, cunora, jiyanojua nia saniniujiuria saaja maninia miijiaca nia quiniuria. Tojetaarucujanaa jiyanooshano nia quiriqiajuhuaj, juhuajaniya nia quiniuria pa Jiyaniijia taci, na nequesoresacari pajaniya.

¹⁵Naacujatij pueyanaa, nio nia niishiriquia: pa Jiyaniijiaari tarishiyajaara pueyacua na taraajenuucua, nocua nojori tiuuniuria, Pueyaso jiyanooniuria nojori. Tarishiyajaarihuaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuahuaj, Pueyaso niishitaja na jiitianuucua.

¹⁶Nojuacuajaari puetunu na naajioneecajinijanaa mariyata nio cua pohuatasano pohuataa. Noojiaqueya na pohuatasanoori seetanujanaa jiyajeneta pueyara. Naacujatij, mosanucua, noojia niquijotejacanio, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacujatij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocujajiyanojua nia cojuariquia tama

nia cuaqueyajaaja maja nia sapojosaanu-
ra sesa miijiaca nia quiniuhuara. Saaja
Pueyaso rupaacua tiuujia nia quiriquia
cutara, taa nocua tiuujia nia quiyacua-
jani, cuno pojori mariqui nioojia
niquijiotereeri. ¹⁸Naajuhuj, socua
pocuai Tacuna niishiniucua jiaatiajaca

nia quiriquia. Naa maninia nia niishiri pa
Jiyaniijia Jesucristo, socua na panijia
nia quiniuria, socua na cumaaca nia
jiitianurajuhuj. ¡Pa Jiyaniijiaari
jiyanohua maninia! ¡Nojuaja cuaara
shuquiritiasaaria quiarjia, pueyaracaanu-
juhuj! Cuaara naa quiiriatej.